

Uunga siunnersuut: Soraarnerussutisiaqalernissamut aaqqissuussinermut peqataasusaaatitaaneq pillugu Inatsisartut inatsisaata allanngortinneqarnera pillugu Inatsisartut inatsisaat nr. Xx, xx.xxx 2022-meersoq

§ 1

Soraarnerussutisiaqalernissamut aaqqissuussinermut peqataasusaaatitaaneq pillugu Inatsisartut inatsisaanni nr. 21, 28. november 2016-meersumi, Inatsisartut inatsisaatigut nr. 18, 30. november 2020-mi allanngortinneqartumi makkuninnga allannguisoqarpoq:

1. § 1, imm. 3, imatut oqaasertalerneqarpoq:

“Soraarnerussutisiaqalernissamut aaqqissuussineq soraarnerussutisiaqalernissamut aningaasaateqarfimmi Danmarkimi imaluunniit Kalaallit Nunaanni angerlarsimaffeqartumi imaluunniit inuunermut soraarnerussutisiaqalernissamullu sillimmasiisarfirmmi Danmarkimi imaluunniit Kalaallit Nunaanni angerlarsimaffeqartumi imaluunniit aningaaserivimmi Kalaallit Nunaanni angerlarsimaffeqartumi aalajangersimasumilluunnit ingerlatsiveqartumi pilersinneqarsimassaaq, takujulli imm. 4 imaluunniit uani Centralforeningen for Stampersonels Pensionsfond (CS-Pensionsfond). Piumasaqaataavoq soraarnerussutisiaqalernissamut aningaasaateqarfik, inuunermut soraarnerussutisiaqalernissamullu sillimasiisarfik imaluunniit aningaaserivik aningaasanik ingerlatsineq pillugu inatsimmi ilaassasoq suliffeqarfillu pineqartoq ingerlatsinissamut Finanstilsynimit akuerineqarsimassasoq.”

2. § 3, imm. 1-4, imatut oqaasertalerneqarput:

“Inuup soraarnerussutisiaqalernissamut aaqqissuussinermut akiliutai ukiumi aningaasarsiorfiusumi 2023-mi ileqqaarnissamut tunngavik 175.00 kr.-uppat qaffasinneruppalluunniit ileqqaarnissamut tunngaviup 7 procentianit annikinnerussanngilaq, takukkilli imm. 2 aamma 5. Ukiumi aningaasarsiorfiusumi 2024-mit 2026-mut procenti ukiumut 1 procentimik qaffanneqartassaaq, taamaalilluni 2026-mi 10 procentiussalluni.

Imm. 2. Imm. 1-imi aalajangersagaq apeqqutaatinnagu inuup ukiumi aningaasarsiorfiusumi 2023-mi soraarnerussutisiaqalernissamut aaqqissuussinermi akiliutai namminerisamik inuussutissarsiornermi sinneqartoorutit 175.00 kr.-uppata qaffasinneruppataluunniit sinneqartoorutit akileraarutaasusaaatitaasut 5 procentiannit annikinnerussanngillat, takujulli imm. 5. Ukiumi aningaasarsiorfiusumi 2024-mit ukiunilu aningaasarsiorfiusuni tulluuttuni akiliutit namminerisamik inuussutissarsiornermi sinneqartoorutit akileraarutaasusaaatitaasut 6 procentiannit annikinnerussanngillat.

Imm. 3. Imm. 1 malillugu qaffasissuseq atuuttoq inuit ileqqaarnissamut tunngaviat 125.000 kr.-uppat assigiiamik 0 procentimiit inuit ileqqaarnissamut tunngaviat 175.000 kr.-uppat 100 procentimut qaffanneqassaaq.

Imm.. 4. Imm. 2 malillugu qaffasissuseq namminerisamik inuussutissarsiornermi inuit sinneqartoorutaat 125.000 kr.-uppat assigiiamik 0 procentimiit inuit sinneqartoorutaat 175.000 kr.-uppat 100 procentimut qaffanneqassaaq.”

3. I§ 7-imi, *imm. 2*, “2.000 kr.” uunga allanngortinneqarpoq: “4.000 kr.”.

§ 2

Inatsisartut inatsisaat ulloq 1. januar 2023 atuutilersinneqarpoq.

Namminersorlutik Oqartussat, ulloq x. xx. xxxx

Naalakkersuisut Siulittaasuata

Siunnersuummut nassuiaatit

Nassuiaatit nalinginnaasut**1. Aallaqqaasiineq**

2022-mut aningaasat inatsit pillugu isumaqatigiissuteqartut isumaqatigiissutigaa soraarnerussutisiaqalernissamut aaqquissuussinermut peqataasussaaitaaneq pillugu Inatsisartut inatsisaat misissorneqassasoq.

Misissuineri ilaatigut Inatsisartut inatsisaata atuutilersinneqarnissaanut kingornalu pisunit misilittakkanik misissuineq ilaavoq.

Innuttaasorpasuit inatsit 1. januar 2018-imi atuutilersinneqarmat inatsit qanorluunniit atuutitinneqassanersoq ilisimanngilaat. Naliliisoqarpoq Inatsisartut inatsisaata atuutilersinnissaa sioqqutingaatsiarlugu annertunerusumik paasisitsiniaasoqarsimassagaluartoq. Paasisitsiniaanermi innuttaasut, sulisitsisut, namminersortut kattuffiillu ilanngunneqartussaasimassagaluarpot.

Tamatuma saniatigut IT-mi nalunaarsuiffiup atorneqarluarsinnaasup ineriartortinnera ajornartorsiutaasimavoq. Ajornartorsiutinut pissutsit arlallit pissutaapput, tassunga ilanngullugit suliap kingusinaarluni aallartinneqarnera, isumalluutini pingaarnersiuiineq, suliassamik naammanngitsumik ilisimasaqarneq, paatsuuinerit il.il. Ajornartorsiutit ilaatigut suliamik ingerlatsineri kukkunernik, suleriaatsinik naleqqutinningsunik il.il. kinguneqarput. IT-mi nalunaarsuiffiit aaqqinnissaannut nukippasuit atorneqarput, ajornartorsiuterpasuillu maannakkut aaqqinneqareerput aaqqinneqalerlutilluunniit. Misilittakkat taakku takutippaat IT-mik ineriartortitsineri taamaattuni suliamik ingerlatsineri pisariaqartumik piginnaasaqartunik sulisunik naammattunik aallaqqaataanit atuinissaq pingaaruteqartoq.

Paasinarsivoq taanna naatsuullunilu paasiuminaraluartoq Inatsisartut inatsisaannik pitsaasumik allaffissornikkut aqutsinissap qulakkeerneqarnissaa ilimagineqartumit ajornakusoornerusoq. Tamassumunnga pissutaasoq pingaaruteqartoq tassaavoq IT-mi nalunaarsuiffimmik ajornartorsiuteqarneq. Pissutaasoq alla tassaasimavoq suliassap immikkoortuni pingaarneri suliassanit Akileraartarnermut Aqutsisoqarfiup sularisartagaanit allaanerup pineqarnera. Taamaammatt suliassap piginnaasalinnik inuttalernerneqarnissaa ajornakusooruusoq paasinarsivoq, , pingaartumik innuttaasunik toqqaannartumik sullissineri tunngatillugu. Suliffimmi namminermi inatsimmik sunniutaanillu ilinniartitsisoqaraluartoq innuttaasunut suliffeqarfinnullu atassuteqarneq piffissat ilaanni ajornartorsiutaanikuuvoq. Pissutaasut pingajuat tassaavoq, Akileraartarnermut Aqutsisoqarfiup piffissami tassani suliniutinik nutaanik arlalinnik ineriartortitsinera atuutilersitsineralu. Assersuutigalugu pineqartut tassaapput pisortat ataatsimut aningaasaqarneri nalunaarsuiffiat Prisme, suliniut maannakkut atorunnaarsinneqareersoq ilanngaassivik, suliffeqarneri ilanngaat nutaaq, akitsuutinik ataatsimoortunik nutaanik

allanngineq atuutilersitsinerlu, akileraartarnermik aaqqissuusseqqinnissamik piareersaaneq, akiliisitsiniartarnerup avammut avataani suliarineqartarnissaa pillugu eqqarsaatit. Misilittakkat takutippaat suliassanik nutaanik ineriartortitsinermut atuutilersitsinermullu nukissat atorpeqarsinnaasut killeqartut. Taamaalilluni iluatsitsinissami pisariaqartoq tassaavoq ineriartortitsinermi suliassanik assigiinngitsunik ingerlaavartumik pingaarnersiuisarnissaq, taamaalilluni sulisunik piginnaasaqartunik amigaateqarnermi suliniutit pitsaasumik piviusunngortinnissaat pinngitsoortinneqarlutik.

Inatsit maannakkut akileraaruseriaatsimi immikkoortunik tungaveqarpoq. Tamassuma inatsisip ajornarpallaanngitsumik paasiuminarnissaa qulakkeertussaavaa. Tamannali akileraartarnermi ajornartorsiutit soraarnerussutisiassanik aaqqissuussinermut peqataasussaataitanermut sunniuteqarnerannik peqatigitillugu kinguneqarpoq. Inatsisartut inatsisaata atuutilersinneqarnerata ajoraluartumik takutippaat sulisitsisut, soraarnerussutisiaqartitsisut allallu ilaasa paasissutissanik Akileraartarnermut Aqutsisoqarfimmut eqqortumik nalunaaruteqarneq ajortut. Kukkunerit taamaattut siusinnerusukkut innuttaasunut ataasiakkaanut annikitsumik kinguneqarajuttarnikuupput. Kisianni Inatsisartut inatsisaatigut nalunaaruteqarnermi kukkunerit taamaattut innuttaasut ileqqaartussaataitanerisa naatsorsornerannut aamma pingaaruteqalerput. Taamaalilluni paasinarsivoq Akileraartarnermut Aqutsisoqarfiup soraarnerussutisiaqarnissamut aaqqissuussinermut peqataasussaataitaneq pillugu aalajangiineri arlallit kukkusumik nalunaarutiginninnermut tunngatinneqarsinnaasut. Inatsisartut inatsisaannik misilittakkat taamaalillutik takutippaat sulisitsisunut, soraarnerussutisiaqartitsisunut allanullu ujartuinerunissamik ilitersuinerunissamillu pisariaqartitsisoqartoq. Misilittakkat aamma takutippaat sulisitsisut soraarnerussutisiaqartitsisullu Danmarkimi akileraartarnermut oqartussanit nalunaarutit pillugit ullumikkornit annertunerusumik paasissutissatik pissarsisarnissaat naleqqutissasoq.

2022-mut aningaasanut inatsimmut atatillugu innuttaasut soraarnerussutisiaqarnissamut aaqqissuussinermut akiliisarnerat tamassuminngalu atuutilersitsineq qaqugukkut aallartinnissaannut isertitat killissaasa qaffannissaat akuerineqarpoq. Aamma akileraartarnermut aqutsisoqarfiup nikingassutaasinnaasunik innuttaasunut qaqugukkut akileeqqusinissaannut minnerpaaffissat qaffanneqarput. Allanguutini ilaatigut siunertaavoq innuttaasunut appasissunik isertitaqartunut isumaqatigiissutit malillugit atorfeqanngitsunut pissutsit pitsanngortinneqarnissaat. Allanguutini aamma siunertaavoq aaqqissuussinermik allaffissornikkut aqutsinermi innuttaasunullu allaffissornikkut suliaakkiivallaarnerit killilerneqarnissaat.

Soraarnerussutisiaqalernissamut aaqqissuussinermut peqataasussaataitanermik atuutilersitsinermi misilittakkat tamarmiusut takutippaat suliassat taamatut ittut siusissukkut aallartinneqartarnissat, annertuumik ujartuillunilu paasisitsiniaasarnissaq, suliffeqarfinnut kattuffinnullu paasissutissanik pingaaruteqartunik tunniussisartunik ujartuinerunissaq, suliassamik ineriartortitsinermut atuutilersitsinermullu sulisunik piginnaasalinnik naammattunik sulisoqarnissaq, aaqqiissutissat naleqquttut qulakkeernissaat siunertaralugu IT-mik avataanit pilersuisut siusissukkut peqataatinneqartarnissaat pingaaruteqartut.

Soraarnerussutisiaqarnissamut peqataasussaaitaanermik atuutilersitsinermi misilittakkat pitsaanerpaajunnikkaluartut, qularutissaanngilaq inatsit pisortat aamma piffissami sivisuumi attanneqarsinnaasumik aningaasaqarnissaannik tapersiinissaq pillugu siunertamik eqqortitsisoq, peqatigitillugulu soraarnerussutisiaqartut inuuniarnermi atugaanik pitsannortitsisoq.

Naatsorsueqqissaartarfik 2020-mi inuit qanoq amerlatigisut isertitat annertussusaannut agguarlugit inuussutissarsiornermi isertaqarnersut naatsorsuivoq.

Isertitat	Ukiut 67	Ukiut 68	Ukiut 69	Ukiut 70	Ukiut 71
100.000 tikillugit	279	260	269	334	2.296
100-150.000	19	23	12	5	41
150-200.000	10	9	11	8	30
200-250.000	17	12	8	5	15
250-300.000	14	4	12	5	17
300-350.000	16	11	7	6	12
350-400.000	14	8	5	9	18
400-500.000	14	20	5	5	13
500-600.000	10	14	4	4	11
600-700.000	8	5	5	4	10
O. 700.000	16	10	11	5	19

Naatsorsuinerup takutippaa innuttaasut 2.482-it 66-it sinnerlugit ukiullit 2020-mi inuussutissarsiornermi isertitaqartut. Innuttaasut 66-it sinnerlugit ukiullit 2020-mi inuit 3.931-upput. Tassa innuttaasut utoqqalinersiaqartut 63 procentiisa missaat ilassutaasumik inuussutissarsiornermi isertitaqarput. Taakku amerlapput, aamma amerlanerit 100.000 kr.-t ataallugit isertaqaraluartut.

Suli sulinissamik nukissaqartut piumassuteqartullu suliffeqaannarnissaat, inuiaqatigiit aningaasaqarnerat tunngavigalugu pitsaasuvoq. Kisiannili innuttaasut ataasiakkaat utoqqalinersiamik tapertaqartinnissaat pisariaqartutut isiginerinnaa pissutiginnarlugu taamatut toqqaasariaqarsimappata, tamanna ajornartorsiutaavoq, inuiaqatigiittut atugarissaartutut iliuuseqarluni isummerfigineqartariaqartoq.

Utoqqaat ukiuni makkunani malunnartumik amerliartorput. Tamassuma utoqqalinersianut aningaasartuutit ukiuni aggersuni qaffakkiartornissaata kinguneraa. Peqqinnissaqarfimmut, utoqqaat angerlarsimaffinnut utoqqaallu illuinut, angerlarsimaffimmi ikiorteqarnernut, atortunik ikiuutunik pissarsinermut il.il. aningaasartuutit qaffakkiartornerat tamatuma aamma kinguneraa.

Innuttaasut katitigaanerisa allanngornera taamaalilluni Kalaallit Nunaani aningaasaqarnermut annertuumik ernumalersitsivoq. Apeqqut tassaavoq siunissami aningaasaqarnermi ajornartorsiutit innuttaasut pisortallu akornanni qanoq agguarneqassanersut. Illuatungaani

innuttaasut soraarnerussutisiaqarnissamut ukioqalersut utoqqalinersiaminnut tapitut sulisariaqarnerat akuerineqarsinnaanngilaq. Aappaatigut utoqqalinersianik aaqqissuussinermik, inuiaqatigiinni suliaassat allat pingaaruteqartut, soorlu assersuutigalugu ilinniartitaanermut suliaasaqarfik sumiginnarneqarluni, aningaasaqarnikkut aningaasartuuteqarfiuaallaartussamik, peqarnissaq iluaqutaanngilaq.

Soraarnerussutisiaqarnissamik aaqqissuussinermut peqataasussaataaneq utoqqalinersiaqartut siunissami utoqqalenersiaminnut tapiutitut sulisariaqarnermik misiginnginnissaasa qulakkeernissaanut pingaaruteqartumik sakkuuvoq. Utoqqalinersiat innuttaasut namminneq ileqqaagaannik tapertaqassapput. Peqatigitillugu nammineq soraarnerussutisiassanut ileqqaarutinit pisartagaqarnerup pisortat utoqqalinersiaqarnermik aaqqissuussinermik taamatut akisutigisumik pisortat aningaasaqarnerannik annertuallaamik atuisariaqarnerannik kinguneqartussaq annikillissavaa.

Inatsisissatut siunnersuummi matumani ilaatigut siunertaavoq soraarnerussutisiassanut ileqqaartussaataaneq pillugu allannguutit 2022-mut aningaasanik inatsisip isumaqatigiissutiginiarnerani isumaqatigiissutaasut inatsisikkut aalajangersaganngortinnissaat. Allannguutit taakku taamaallaat 2022-mut aningaasanut inatsimmut oqaaseqaatini allaqqapput. Kisiannili inatsisini atajuartussamik allannguutit oqaaseqaatitigut piviusunngortinneqarsinnaanngillat, taamaammallu inatsimmi namminermi ilanngunneqarnissaat pisariaqarpoq, taamaanngippat taakku 2022-p naanerani atorunnaartussaammata.

Tamassuma saniatigut ilaatigut inatsisip misissornerata ilaatigullu inatsimmik allaffissornikkut aqutsinermi misilittakkat kingunerannik allannguutit annikitsut siunnersuutigineqarput.

Naalakkersuisut isumaqarput, inatsit matuma kingorna inuiaqatigiit aningaasaqarnerisa sivilisuumik nappassinnaanerata qulakkeernissaanik pisariaqartitsinerup aamma innuttaasut pisisinnaassusiisa qulakkeernissaanik pisariaqartitsinerup akornanni naleqquttumik oqimaqatigiissitsinermik takutitsisoq.

2. Siunnersuummi immikkoortut pingaarnerit

Siunnersuutigineqarpoq soraarnerussutisiassanut aaqqissuussinerit Centralforeningen for Stampersonels Pensionsfondimi (CS-Pensionsfond) pilersinneqartuni inatsimmi piumasaqaatinik eqqortitsinissaat erseqqissarneqassasoq. Aningaasaateqarfik imminut pigisuuvoq, ilaasortat Danmarkimi Sakkutuunut aamma Sillimaniarnermut Aqutsisoqarfimmut isumaqatigiissutaat naapertorlugu akiliutinik aqutsinermi utoqqalinersiaqarnissaq siunertaralugu ileqqaakkanut akuerisaasanut atorneqarnissaannik siunertaqartoq.

Sakkutuuni atorfeqartut ilaat Kalaallit Nunaanni sulisut atorfeqarnermik kinguneranik CS-Pensionsfondimut akiliisarput. Taamaammat aningaasaateqarfimmut akiliutit taakku

atorfeqartut akiliutaannik naatsorsuinermini ilanngunneqarnerat Inatsisartut inatsisaannut tassaniilu siunertamut naapertuulluarpoq.

Siunnersuutigineqarpoq Inatsisartut inatsisaanni § 3 imm. 1-imit 4-mut isertitat killingi 100.000 kr.-nit 125.000 kr.-nut aamma 150.000 kr.-nit 175.000 kr.-nut qaffanneqassasut. Imm. 1-imit 4-mut ileqqaaruteqartussaataitanerup qaqugukkut atuutilernissaanut aningaasat killinginik aamma ukiut ingerlaneranni aningaasat qanoq atuutinneqarnissaannik imaqarput. Allannguutini innuttaasut appasissunik isertitaqartut atorfeqarnermi pissutsit kingunerinnngisaannik soraarnerussutisiaminnut ileqqaagaqanngitsut aningaasatigut atugassaasut pitsanngortinneqarsinnaalersinneqarput. Siunnersuummi allannguutit 2022-mut aningaasanut inatsimmut atatillugu akuerineqartut ingerlateqqinneqarput.

Aamma siunnersuutigineqarpoq Inatsisartut inatsisaanni § 7. imm. 2-mi aningaasat minnerpaaffissaat 2.000 kr.-nit 4.000 kr.-nut qaffanneqassasut. Siunnersuummi innuttaasut appasissunik isertitaqartut aningaasaqarnermi nanertuutaat killilernerqarpoq aammalu akileraaruseriffimmi allaffissornermi suliassat annikillisinneqarlutik.

3. Pisortanut aningaasaqarnermi allaffissornermilu kingunissai

Siunnersuut pisortanut aningaasaqarnermi piffissami sivikitsumi kinguneqassanngilaq.

Piffissami sivisunerusumi inuiaqatigiit aningaasaqarneranni attassiinnarnissami ajornartorsiutaat annertusissaaq, tassa innuttaasut ilaasut soraarninngorunik imminnut pilersornissamut annikinnerusumik tapersiissammata.

Ilimagineqarpoq allaffissornermi aningaasat minnerpaaffissaasa qaffasinnerusut kingunerannik suliassat annikillilaassasut.

4. Inuussutissasiortunut aningaasaqarnermi allaffissornermilu kingunissai

Ilimagineqarpoq siunnersuut inuussutissarsiortunut aningaasaqarnermi allaffissornermilu kinguneqassanngitsoq.

5. Avatangiisinut, pinngortitamut inuiaqatigiillu peqqissusaannut kingunissai

Siunnersuut avatangiisinut pinngortitamullu kinguneqassanngilaq. Siunnersuut aamma inuiaqatigiit peqqissusiannut tunngatillugu kinguneqassanngilaq.

6. Innuttaasunut kingunissai

Allannguutini innuttaasut appasissunik isertitaqartut atorfeqarnermi pissutsit kingunerinnngisaannik soraarnerussutisiaminnut ileqqaagaqanngitsut aningaasatigut atugassaasut pitsanngortinneqarsinnaalersinneqarput. Innuttaasulli taakku inuunerminni annikinnerusunik ileqqaagaqaramik soraarninngorunik aningaasanik ikinnerusunik inuussutissaqassapput.

Siunnersuut innuttaasunut tamassuma saniatigut kinguneqassanngitsoq naatsorsuutigineqarpoq.

7. Kingunissai annertuut allat

Siunnersuut allanik kinguneqassanngitsoq naatsorsuutigineqarpoq.

8. Pisortanut kattuffinnillu il.il. tusarniaaneq

Siunnersuut ulloq xx.xxxx-mit ulloq xx.xxx-mut 2022 soqutigisaqartunut ukununga tusarniutigineqarpoq:

Avannaata Kommunia, Kommuneqarfik Sermersooq, Kommune Qeqertalik, Qeqqata Kommunia, Kommune Kujalleq, Grønlandske Advokater, SIK, GE, Sulisitsisut, NUSUKA, GrønlandsBanken, BankNordik, ASG, IMAK, KNAPK, PPK, AK, NPK, PFA, SISA, Siulittaasup Naalakkersuisoqarfia, Inuussutissarsiornermut Niuernermullu Naalakkersuisoqarfik, Aalisarnermut Piniarnermullu Naalakkersuisoqarfik, Isumaginninnermut Sulisoqarnermullu Naalakkersuisoqarfik, Ilinniartitaanermut, Kultureqarnermut, Timersornermut Ilageeqarnermullu Naalakkersuisoqarfik, Peqqissutsimut Naalakkersuisoqarfik, Nunalerinnermut, Imminut Pilersornermut, Nukissiuuteqarnermut Avatangiisinullu Naalakkersuisoqarfik. Ineqarnermut Attaveqarnermullu Naalakkersuisoqarfik, Aatsitassanut Inatsisinillu Atuutsitsinnermut Naalakkersuisoqarfik, Meeqqanut, Inuusuttunut Ilaqutariinnullu Naalakkersuisoqarfik, Aningaasaqarnermut Aqutsisoqarfik aamma Illersornissamut Ministeriaqarfik.

Siunnersuut aamma piffissami qulaani taaneqartumi tusarniaarnermut nittartakkami pissarsiarineqarsinnaavoq.

Tusarniaanermi akissutini tiguneqartuni immikkoortut pingaarnerit ilanngussaq 1-imi ataaniittumi ilanngunneqarput oqaaseqarfigineqarlutillu.

Aalajangersakkanut ataasiakkaanut nassuiaatit

§ 1-imut

Nr. 1-imut

Siunnersuummi Centralforeningen for Stampersonels Pensionsfond-imut (CS-Pensionsfond) akiliutit inatsit tunngavigalugu soraarnerussutisiassanut aaqqissuussinermut akiliutit isigineqarnerat erseqqissarneqarpoq.

Nr. 2-mut

Siunnersuutigineqarpoq imm. 1-imit 4-mut aningaasat killingi 100.000 kr.-nit 125.000 kr.-nut aamma 150.000 kr.-nit 175.000 kr.-nut qaffanneqassasut.

Nr. 3-mut

Siunnersuutigineqarpoq § 7, imm. 2-mi aningaasat minnerpaaffissaat 2.000 kr.-nit 4.000 kr.-nut qaffanneqassasut.

§ 2-mut

Siunnersuutigineqarpoq Inatsisartut inatsisaat ulloq 1. januar 2023 atuutilersinneqassasoq.